

Aunke cu el a conoce retraso

Ta spera di inaugura carnival museo na september 2016

ORANJESTAD (AAN): Den un declaracion dunasimanpasa, Minister encarga cu Turismo y Cultura, Otmar Oduber, a duna comentario tambe con e proyecto pa Carnival Museum ta desaroyando.

Gobierno di Aruba a cumpra un edificio cu tabatin casi 10 aña para, despues cu el a wordo uza como un supermercado, net na entrada di San Nicolas. Sinembargo no por a desaroya e proyecto aki mes lihe cu Gobierno tabata desea, segun Oduber a duna di conoce. “Un aspecto tecnico relaciona cu e fondonan di FDA ta e motibo pakico no por a cuminsa cu e proyecto aki,” e mandatario a splica prensa. Tin un suma di 5.7 miyon florin cu a wordo aloca pa e proyecto aki, pero tabata falta un aspecto pa caba cu e Business Plan di henter e compleho cu mester compania e project-dossier entrega na



FDA.

Aunke cu Minister Mike de Meza ta e trekker di e proyecto aki, cual a cumins cune bou di e prome gubernacion di partido berde, e lo by wordo hinca bou di e fundacion nobo (Fundacion di Museonan Arubano) den cual lo hinca tur e museonan y ta cay bou di departamento di cultura.

E mandatario ta kere cu den e proximo lunanan e aprobacion di FDA pa e proyecto aki lo por wordo duna y lo por cuminsa mira movencion na e edificio cu a wordo cumpra pa e proyecto di Carnival Museum. E proyecto ta encera reconstruccion y remodelacion di e edificio existente di ex Green Hill Supermarket, pero tambe e inventario. Nan ta spera cu pa september 2016, e proyecto aki por wordo inaugura.

Aunke cu e ta hiba e nomber di Carnival Museum,, otro organisacionnan lo por haci uzo di e facilidatnan, y e lo bira un centro di exposicion. “Nos kier crea y bin bek pa muestra na pueblo tur loke cu den pasado tabata forma parti di nos carnaval, o sea su historia combina cu caracteristicanan di awendia.”